

■ PLED PER LA DUMENGIA

La minuta persa

DA GISULA TSCHARNER

Savair ir enturn cun las pausas, quai saja la vaira maistria en il Jazz – quai ha ditg ier in dals musicists envidads en l'emissiuon «Jazz-Talk», al radio DRS 2. En la musica è la pausa quel spazi da temp, en il qual i na dat nagins tuns, nua ch'in dals instruments tascha, ubain tuts. Il sun dal silenzi, la tensiuon suenter ed avant il tun. La ritgezza dal nagut, la melodia da la pausa.

La construcziun dal Jazz-Talk m'è vegnida endament questa saira sin la staziun da viafier, nua ch'jau aveva da spetgar il tren per Cuira (e vinavant a Turitg). A chasa avev jau fatg preschas, cun pachettar mias set chaussas, cun semtgar la tschaina per mes um e cun serrar tut ils ischs – per cun-tanscher cun auto la staziun da viafier giu plaun ad uras ston ins adina calcular avunda peda, ins sa-

vess gia gartegiar en in muvel da vaccas, suenter in tractor paun ecc.

Quella gia èsi i pli che bain, jau hai anc 10 minutas da spetgar. Sesel sin il banc e gjaudel quest temp regalà. L'emprim è anc vegnì il patratg: «Prender il händi e far spert dus telefons, purtar en in-satge en l'agenda», ma subit realisesch jau la tuppada. Jau stendel las tgommas, il dies pos jau vi da la paraid da veder da la cabina da spetga, e... stun simplamain là! Nundisturbada. Ina vaira eternitad èni, las 10 minutas, in paradis entaifer mes program. Ina fanestra en il mir dal di, ina largia en il temp.

Gia oz ma legr'jau da la proxima giada cur ch'jau hai da spetgar x-in tren regional che na correspunda betg gist cun ils trens sperts. Spetgar 40 minutas sin la staziun: Juhui!! Tantas minutas, in spazi per tut u per nagut. Per studgiar davart la vita, per tuegiar la

massa da novitads orriblas dal mund e per chattar inslas positivass tranter quellass, per ma reguardar d'ina sentupada plain senn e buna energia. Per na pensar zunt nagut. Temp pers? Temp regalà!

Però questas oasas da temp secretas chattas ti mo, viagiond cun meds dal traffic public; vi da la roda da tes automobil has Ti adina dad esser sin pichet per suandar spess spess al char avant tai, en il staup. È quest artitgel pia in pled per il traffic public enstagl per la dumengia? Na, per cuntrari: La dumengia è qua per ans permetter ina pausa impurtanta en il mintgadi. Ina largia entaifer il temp programmà. Quels che lavuran la dumengia, han da bien in auter di per pausar. Dal stress da lavur sco er dal stress dal hobby e divertiment. A tuts ch'han legì questas lingias giavisch jau il regal dad ina minuta persa sontga!